

傷之也使念善順常若此唯唯不敢懈怠也
不敢懈怠

右念別治所象安危法

太平經卷之五十三

太平經卷之五十四五十五

使能無爭訟法第八十一

傳二

吾所問積多見天師言事快而無已其問無足時復謹乞一兩言平行今吾願欲得天地陰陽人民踐行萬物凡事之心意常使其喜善無已日遊而無職無事其身各自正不復轉相愁苦更相適責豈可得聞乎哉子今且言何一絕快殊異可問者何一好善無雙也然若子所問猶當順事各得其心而因其材能所及無敢反強其所不能為也如是即各得其所欲各得其欲則無有相愁苦者也即各得其心意矣可謂遊而無職事矣天地之間常悉使非其能強作其所不及而難其所不能時觀於其不能為不能言不憐而教之反就責之使其竟結多忿爭訟民愁苦困窮即仰而呼皇天誠冤誠冤氣感動六方故致災變紛紛畜積非一不可卒除為害甚甚是即失天下之人心意矣終及無成功變怪不絕太平之氣何從得來哉故不能致太平也各正在此雖欲名之為常平而內亂何從而

得清其治哉子今問之欲深知其審乎天地之性萬物各自有宜當任其所長所能為所不能為者而不可強也萬物雖俱受陰陽之氣比若魚不能無水游於高山之上及其有水無有高低皆能游往大木不能無土生於江海之中是以古者聖人明王之授事也五土各取其所宜趣其物得好且善而各暢茂國家為其得富令宗廟重味而食天下安平無所疾苦惡氣休止不行為害如人不卜相其土地而種之則萬物不得成竟其天年皆懷冤結不解因而天終獨上感動皇天萬物無可收得則國家為其貧極食不重味宗廟飢渴得天下愁苦人民更相殘賊君臣更相欺詒外內殊辭各正始起於此是者尚但萬物不得其所何況人哉天下不能相治正由此也此者大害之根而危亡之路也可不慎哉可不深思慮之習心乎故古者大聖大賢將任人必先試其所長何所短而後置其職事因而任之其人有過因而責之責問其所長不過所短是者不感天也及為習進此

家學因而慎之故能得天下之心也今後世
忽事不深思惟古聖人言及署非其職責所
不能及問所不能觀盲者不觀日瘡者不能
言反各趣得其短以為重過因而罪之不為
欲樂相利祐反為巧弄上下迭相賊害此是
天下之大敗也自古者諸侯太平之君無有
奇神道也皆因任心能所及故能致其太平
之氣而無冤結民也禍亂之將起皆坐任非
其能作非其事職而重責之其刑罰雖坐之
而死猶不能理其職務也災變連起不可禁
止因以為亂敗吉凶安危正起於此是以古
者將為帝王選士皆先問視試其能當與天
地陰陽瑞應相應和不能相應和者皆為
偽行其相應和奈何大人得大應小人得小
應風雨為其時節萬物為其好茂百姓為其
無言鳥獸踐行為其安靜是其効也故治樂
欲安國者審其署置夫天生萬物各有材能
又實各有所宜猶龍昇於天魚遊於淵此之
謂也夫治者從天地立以求運萬端天變易
亦其時異要當承天地得其意得其所欲為

也天者以三光為書文記則一興一衰以風
為人君地者以山川阡陌為文理山者吐氣
水通經脈衰盛動移崩合以風異為人臣人
者以音言語相傳書記文相推移萬物者以
衰盛而談語使人想而知之人者在陰陽之
中央為萬物之師長所能作最衆多象神而
有形變化前却主當疏記此變異為其主言
故一言不通則有冤結二言不通軌有杜塞
三言不通轉有隔絕四言不通和時不應其
生物無常五言不通行氣道戰六言不通六
方惡生七言不通而破敗八言不通而難處
為數家九言不通更相賊傷十言不通更相
變革故當力通其言也古者無文以何通之
文通當起但中止天地者幾何起幾何止但
後世不觀之耳中古三皇當無文而設言下
古復有天地之氣一絕一起獨神人不知老
所從來經歷多故知其分理內當有文後世
實不觀言其無有何故時有文時無乎哉天
氣且弊人且愚薄不壽不能有可刻記故初
之以書文今可傳往來以知古事無文且相

辨訟不能相正各自言是故使有文書此但
時人愚故為作書天為出券文耳見師言已
知之矣顧聞今通氣當云何但三道通行八
方之書民吏白衣之言勿苟留急者以時解
之不急者隨天地萬物須七月物終八月而
簡視九月而更次十月而不歸三年上書而
盡信誠者求其人而任之此人延國家之良
臣聰明善耳目因以視聆不失四方候也帝
王得之曰安而明故當任之其任之云何乎
必各問其能所及使各自疏記所能為所能
分解所能長因其天性而任之所治無失者
也故得天下之歡心其治日興太平無有刑
無窮物無冤民天地中和盡得相通也故能
致壽上皇所以壽多者無刑不傷多傷者延
還傷人身故上古者聖賢不肯好為刑也中
古半用刑故壽半下古多用刑故壽獨少也
刑者其惡過于天逆陰陽畜積為惡氣還傷
人故上古聖賢不重用之者延惜其身也中
古人半愚輕小用刑故半賊其半下古大愚
則自忽用刑以為常法故多不得壽谷在此

讀此書者宜反復之重之慎之死生重事不可妄也天子賢明者為父計臣賢明者為君深計子不賢不肯為父深計臣不賢明不肯為君計是少年者即是其人身邪其人邂逅吉凶者流後生此格法也是故上古聖帝王將任臣者謹選其有道有德不好殺害傷者非為民計也迺自為身深計也故得天地心意舉措如與神俱此之謂審舉得其人而得人力之君也如此迺感神祇迺後天上真神愛之因而獨壽也好用刑迺與陰氣并陰若殺故不得大壽天之命略可觀可知矣天地人所疾惡同耳

右得天地人民萬物歡心國興家安天下無爭訟者

太平經卷之五十四

太平經卷之五十五

力行博學訣第八十二

今大命可知與未手雖然可知矣見明師比言大迷惑已解唯加不得已願復丁寧之然吾道可觀意矣得書讀之常苦其不熟熟者自悉知之不善思其至意不精讀之雖得吾書亦無益也得而不力行與不得何異也見食不食與無五穀何異見漿不飲渴猶不可救此者非能愁他人也還自害可不詳哉故聖人力思君子力學晝夜不息也猶樂欲象天轉運而不止百川流聚迺成江海子慎吾言記吾已重誠子其眷眷心可觀矣為善與眾賢共之慎無專其市夫市少人所求不得故人不博學所觀不明故令使見其真道不得其要意不信道則疑不篤乎各在此人之所以自窮者也故當深惟思其意以令自救輔也

右對壽命指

知盛衰還年壽法第八十三

天之授事各有法律命有可屬道有可為出

或先或後其漸豫見比若萬物始萌於子生於卯垂枝於午成於酉終於亥雖事豫見未可得保也事各有可為至光景先見其事未對豫開其路天之垂象也常居前未常隨其後也得其人而開通得見祐助者是也不開不通行之無成功即非其人也以是為明證道審而言萬不失一也但是其人明為其開非其人則閉審得其人則可以除疾災異自消夷狄自降不須兵革皆自消亡萬物之生各有可為設張得其人自行非其自藏凡事不得其人不可強行非其有不可強取非其土地不可強種種之不生言種不良內不得其處安能久長六極八方各有所宜其物皆見事事不同若金行在酉木行在東各得其處則昌失其處則消亡故萬物著於土地迺生不能著於天日月星曆反著於天迺能生光明天道如此矣故有其人星在天時有明墮地及無光即非其處也故亂常道有可為出不妄行是其人則明非其人則不可行天道迺深遠不可測商矣失之者敗得之者